

全

唐

詩

三

全唐詩

三

岳麓書社



全唐诗卷二百十六

杜 甫

杜甫，字子美。其先襄阳人，曾祖依艺为巩令，因居巩。甫天宝初应进士，不第。后献《三大礼赋》，明皇奇之，召试文章，授京兆府兵曹参军。安禄山陷京师，肃宗即位灵武，甫自贼中赴行在，拜左拾遗。以论救房琯，出为华州司功参军。关辅饥乱，寓居同州同谷县，身自负薪采椽，哺糲不给。久之，召补京兆府功曹，道阻不赴。严武镇成都，奏为参谋、检校工部员外郎，赐緋。武与甫世旧，待遇甚厚。乃于成都浣花里种竹植树，枕江结庐，纵酒啸歌其中。武卒，甫无所依，乃之东蜀就高适。既至而适卒。是岁，蜀帅相攻杀，蜀大扰。甫携家避乱荆楚，扁舟下峡，未维舟而江陵亦乱。乃溯沿湘流，游衡山，寓居耒阳。卒年五十九。元和中，归葬偃师首阳山，元稹志其墓。天宝间，甫与李白齐名，时称李杜。然元稹之言曰：“李白壮浪纵恣，摆去拘束，诚亦差肩子美矣。至若铺陈始终，排比声韵，大或干言，次犹数百，词气豪迈而风调清深，属对律切而脱弃凡近，则李尚不能历其藩

翰，况堂奥乎。”白居易亦云：“杜诗贯穿古今，尽工尽善，殆过于李。”元、白之论如此。盖其出处劳佚，喜乐悲愤，好贤恶恶，一见于诗，而又以忠君忧国、伤时念乱为本旨。读其诗，可以知其世，故当时谓之诗史。旧集诗文共六十卷，今编诗十九卷。

奉赠韦左丞丈二十二韵

韦济，天宝七载为河南尹，迁尚书左丞。

纨袴不饿死，儒冠多误身。丈人试静听，贱子请具陈。甫昔少一
作妙年日，早充观国宾。读书破万卷，下笔如有神。赋料扬雄敌，诗看子建亲。李邕求识面，王翰愿卜一作为邻。自谓颇挺出一作生，一作特，立登要路津。致君尧舜上，再使风俗淳。此意竟萧条，行歌非隐沦。骑驴三十载，旅食一
作客京华春。朝扣富儿门，暮随肥马尘。残杯与冷炙，到处潜悲辛。主上顷见征，欷然欲求伸。青冥却垂翅，蹭蹬无纵鳞。天宝中，诏征天下士有一艺者，皆得诣京师就选。李林甫抑之，奏令考试，遂无一人得第者。

甚愧丈人厚，甚知丈人真。每于百僚上，猥诵佳句新。窃效贡公喜，难甘原宪贫。焉能心怏怏，只是走踈踈。今欲东入海，即将西去秦。尚怜终南山，回首清渭滨。常拟报一饭，况尚怜终南山，回首清渭滨。常拟报一饭，况怀辞大臣。白鸥没一作波浩荡，万里谁能驯。

送高三十五书记 高适，渤海人。解褐为封丘尉，不就。客游河西，哥舒翰奇之，表为书记。

崆峒小麦熟，且一作吾愿休王师。请公问主将，焉用穷荒为。积石军每岁麦熟，吐蕃获之，边人呼为吐蕃麦庄。天宝六年，哥舒翰掩击，大破之，后不敢复至。八载，又克其石堡城。然自此用兵河西不已，故遣言戒之，欲遣告翰也。饥鹰未饱肉，侧翅随人飞。高生跨鞍马，有似幽并一作并州儿。脱身簿尉中，始与捶楚唐簿尉有罪，辄受鞭撻辞。借问今何官，触热向武威。答云一作言一书记，所愧国士知。人实不易知，更一作尤须慎其仪一作宜。十年出幕府，自可持旌麾一作旗。此行既特达，足以慰所思一作亦足慰远思。男儿功名遂，亦在老大时。常恨结欢浅，各在天一涯。

又如参与商，惨惨中肠一作中肠安不悲。惊风吹一作飘鸿鹄，不得相追随。黄尘翳沙漠，念子何当一作时归。边城有馀力，早寄从军诗。

赠李白

二年客东都，所历厌机巧。野人对膾腥，蔬食常不饱。岂无青精一作机，一作饭，使我颜色好。苦乏大一作买药资，山林迹如扫。李侯金闺彦一作深，脱身事幽讨。亦一作来有梁宋游，方期拾瑶草。

游龙门奉先寺 龙门即伊阙，一名阙口，在河南府北四十里。

已从招提游，更宿招提境。阴壑生虚一作灵籁，月林散清影。天阙一作阙，一作阙，一作窥，一作开象纬逼，云卧衣裳冷。欲觉闻晨钟，令人发深省。

望岳

岱宗夫如何，齐鲁青未了。造化钟神秀，阴阳割昏晓。荡胸生曾云，决眦入归鸟。会当凌绝顶，一览众山小。

陪李北海宴历下亭 天宝初，李邕为北海太守。历下亭在

齐州，以历山得名。

东藩驻皂盖，北渚凌青荷一作清河，一作清荷。海内一作右此亭古，济南名士多。原注：时邑人蹇处士在座。云山已发兴，玉佩仍当歌。修竹不受暑，交流空涌波。蕴真惬所遇，落日将如何。贵贱俱物役，从公难重过。

同李太守登历下古城员

外新亭，亭对鹊湖原注：时李之芳自尚书郎出齐州，置此亭

新亭结构罢，隐见清湖阴。迹籍台观旧，气溟一作冥海岳深。圆荷想自昔，遗堞感至今。芳宴此时具一作俱，哀丝一作弦千古心。主称寿尊客，筵秩宴北一作密林。不阻蓬筇兴，得兼一作兼得梁甫吟。

玄都坛歌寄元逸人

故人昔隐东蒙峰，已佩含景公公孙端剑铭：含景吐商。苍精龙。剑之在左，苍龙象也。故人今居子午谷，独在一作并阴崖结一作白茅屋。屋前太古玄都坛，青石漠漠常一作松风寒。子规夜啼山竹裂，王母昼下云旗翻一作蟠。知君此计成一作诚长往，芝草琅玕日应长。铁锁终南大秦岭有采蜜人山行，早钟声而入。至

一寺，旁有大竹林一二顷，截竹盛蜜。归以告戍卒，卒复往取竹，见崖垂铁锁长三丈。掣锁欲上，二虎踞崖大呼，惊怖而返。高垂不可攀，致身福地何萧爽。

今夕行原注：自齐赵西归至咸阳作。

今夕何夕岁云徂，更长烛明不可孤。咸阳客舍一事无，相与博塞一作赌博为欢娱。冯陵大叫呼五白，《招魂》：成臬而卒，呼五白些。五白、臬、卢、雉，皆博齿也。袒跣不肯成臬卢一作卒。英雄有时亦如此，邂逅岂即非良图。君莫笑，刘毅从来布衣愿，家无儋石输百万。

贫交行

翻手作云覆手雨，纷纷轻薄何须数。君不见管鲍贫时交，此道今人弃如土。

兵车行

车辚辚，马萧萧，行人弓箭各在腰。耶娘妻子走相送，尘埃不见咸阳桥。牵衣顿足阑一作桥道哭，哭声直上干云霄。道傍过者问行人，行人但云点行颇。或从十五北防河，开元十五年，以吐蕃为边害，诏陇右、河西兵集临洮，朔方兵集会州，防秋。至至初无寇而罢。便至四十西营

田。去时里正唐制：百户为一里，里置正一人。与裹头，归来头白还一作犹戍边。边亭一作庭流血成海水，武一作我皇唐人称太宗为文皇，明皇为武皇。开边意未已。君不闻汉家山东太行之东。唐都长安，凡河北诸道，皆为山东。二百州，千村万落生荆杞。纵有健妇把锄犁，禾生陇亩无东西。况复秦兵耐苦战，被驱不异犬与鸡。长者虽有问，役夫敢申恨。且如今年冬，未休关一作陇西卒。一作：役夫心益愤。如今纵得休，还为陇西卒。《通鉴》：天宝九载十二月，关西游奕使王难得击吐蕃，克五桥，拔树敦城。县官急索租一作县官云急索，租税从何出。信知生男恶，反是生女好。生女犹是一作得嫁比邻，生男一作儿埋没随百草。君不见青海头，古来白骨无人收。新鬼烦冤旧鬼哭，天阴雨湿声一作悲啾啾。钱谦益曰：天宝十载，鲜于仲通讨南诏蛮，士卒死者六万。制大募两京及河南北兵以击南诏，人莫肯应。杨国忠遣御史分道捕人，枷送军所。此诗序南征之苦，设为役夫问答之词。君不闻以下，言征戍之苦，海内驿骚，不独南征一役为然也。

高都护骢马行 高仙芝，开元末为安西副都护。

安西都护胡青骢，声价欻然来向东。此马临阵久无敌，与人一心

成大功。功成惠养《赭白马赋》：愿终惠养。随所致，飘飘一作摇远自流沙至。雄姿未受伏枥恩，猛气犹思战场利。腕一作腕促蹄高如踣铁，交河几蹴曾冰裂。五花鬣为辔，或三花，或五花，或云印以三花飞凤之字。散作云满身，万里方看汗流血。长安壮儿不敢骑，走过掣电倾城知。青丝络头为君老，何由却出横门道。长安城北出西头第一门曰横门，其外有横桥。

天育骠骑 一本有图字歌天育，厩名，未详所出。

吾闻天子之马走千里，今之画图无乃是。是何意态雄且杰，骏一作鬣尾萧梢朔风起。毛为绿縹一作骠两耳黄，眼有紫焰双瞳方。矫矫一作然龙性一作矫龙性逸合东坡书作含变化，卓立天骨森开张。伊昔太仆张景顺，监牧攻驹一作考牧攻驹，一作考牧神驹阅清峻。遂令大奴汉昌邑王使大奴以衣车载女子。注：奴之尤长大者。此言景顺之牧马奴耳。守一作字天育，别养骥子怜神俊一作骏。当时四十万匹马，张公叹其材尽下。故独写真传世人，见之座右久更新。年多物化空形影，呜呼健步无由骋。如今岂无骀衰与骅骝，时无王良伯乐死即休。

白丝行

缫丝须长不须白，越罗蜀锦金粟尺。象一作牙床玉手乱殷红，万草千花动凝碧。已悲素质随时染一作改，裂下鸣机色相射。美人细意熨帖平，裁缝灭尽针线迹。春天衣著为君舞，蛱蝶飞来黄鹂语。落絮游丝亦有情，随风照日宜一作疑轻举。香汗轻一作清尘污颜色一作似微污，一作污不著，一作似颜色，开新合故置何一作相许。君不见才一作志士汲引难，恐惧弃捐忍羁旅。

秋雨叹三首

雨中百草秋烂死，阶下决明颜色鲜。著叶满枝翠羽盖，开花无数黄金钱。凉风萧萧吹汝急，恐汝后时难独立。堂上书生空白头，临风三嗅馨香泣。

阑一作兰风长去声，一作伏，一作仗雨一作东风细雨秋纷纷，四海一作万里八荒同一云。去马来牛不复辨，浊泾清渭何当分。禾一作木头生耳黍穗黑，农夫田妇一作父无消息。城中斗米换一作靴衾褐，相许宁论两相直。

长安布衣谁比数，反锁衡门守环堵。老夫不出长蓬蒿，稚子无忧走音奏风雨。雨声飏飏催早寒，胡雁翅湿高飞难。秋来未曾一作省见白日，泥污后一作厚土何时干。

叹庭前甘菊花

檐一作阶，一作庭前甘菊移时晚，青蕊重阳不堪摘。明日萧条醉尽一作尽醉醒，残花烂熳开何益。篱边野外多众芳，采撷细琐升中堂。念兹空长大枝叶，结根失所缠一作理风霜。

醉时歌

原注：赠广文馆博士郑虔。

诸公衮衮登台一作华省，广文先生官独冷。甲第纷纷厌粱肉，广文先生饭不足。先生有道出羲皇，先生有才一作文，一作所谈，一作所谈，一作所抱过屈宋。德尊一代常坎轲一作蹶，名垂万古知何用。杜陵野客更一作见嗤，被褐短窄一作穴鬓如丝。日余太一作泰仓五升米，时赴郑老同襟一作衾期。得钱即相觅，沽酒不复疑。忘形到尔汝，痛饮真一作直吾师。清夜沈沈动春酌，灯一作檐前细雨檐一作

灯花落。但觉高歌有一作感鬼神，焉知饿死填沟壑。相如逸才亲涤器，子云识字终投阁。先生早赋归去来，石田茅屋荒苍苔。儒术于我何有哉，孔丘盗跖俱尘埃。不须闻此意惨怆，生前相遇且衔杯。

醉歌行 原注：别从侄勤落第归。勤一作劝。

陆机二十作文赋，汝更小年能缀文。总角草书又神速，世上儿子徒纷纷。骅骝作驹已汗血，鸷鸟举翮连青云。词源一作赋倒流一作倾三峡水，笔阵独扫千人军。只今年一作生才十六七，射策君门期第一。旧穿杨叶真自知，暂蹶霜蹄未为失。偶然擢秀非难取，会是排风有毛质。汝身已一作即见唾成珠，汝伯何由髮如漆。春光澹一作潭沲秦东亭，渚蒲牙白水荇青。风吹客衣日杲杲，树搅离思花冥冥。酒尽沙头双玉瓶，众宾皆一作已醉我独醒。乃知贫贱别更苦，吞声踣躅涕泪零。

赠卫八处士

人生不相见，动如参与商。今夕一作此复何夕，共此灯烛一作宿此灯光。少壮能几时，鬢髮各已苍。

访旧一作问半为鬼，惊一作呜呼热中肠。焉知二十载，重上君子堂。昔别君未婚，儿女忽成行。怡然敬父执，问我来何方。问答乃未已一作未及已，儿女一作驱儿罗酒浆。夜雨翦春韭，新一作晨炊间一作闻黄粱。主称会面难，一举累一作蒙十觴。十一作百觴亦不醉一作醉，感子故意长。明日隔山岳，世事两茫茫。

苦雨奉寄陇西公兼呈王

徵士 原注：陇西公，即汉中王瑀。徵士，琅邪王徽。

今秋乃淫雨，仲月来寒风。群木水光下，万象一作家云气中。所思碍行潦，九里信不通。悄悄素渚路，迢迢天汉东。愿腾六尺马一作驹，背若孤征鸿。划见公一作君子面，超然欢笑同。奋飞既胡越，局促伤樊笼。一饭四五起，凭轩心力穷。嘉蔬没混浊，时菊碎榛丛。鹰隼亦屈猛，乌鸢何所蒙。式瞻北邻居，取适南巷翁。挂席钓川涨，焉知清兴终。

同诸公登慈恩寺塔 原注：

时高适、薛据先有此作。按寺乃高宗在东宫时为文德皇后立，故名慈恩。

高标跨苍天一作穹，烈风无时休。
 自非旷一作壮士怀，登兹翻百忧。
 方知象教力，足一作立可追冥搜。
 仰穿龙蛇窟，始出一作惊枝撑幽。
 七星在北户一作户北，河汉声西流。
 羲和鞭白日，少昊行清秋。秦
一作泰山忽破碎，泾渭不可求。俯
 视但一气，焉能辨皇州。回首叫
 虞舜，苍梧云正愁。惜哉瑶池饮
一作燕，日晏昆仑丘。黄鹄去不
 息，哀鸣何所投。君看随阳雁，各
 有稻粱谋。

示从孙济 济字应物，官给事中，京兆尹。

平明跨驴出，未知一作委适谁门。
 权门多噂喙，且复寻诸孙。诸孙
 贫无事，宅舍如荒村。堂前自生
 竹，堂后自生萱。萱草秋已死，竹
 枝霜不蕃一作翻，一作繁。淘米少汲
 水，汲多井水浑。刈葵莫放手，放
 手伤葵根。阿翁懒惰久，觉儿行
 步奔。所来一作求为宗族，亦不为
 盘飧。小人利口实一作实利口，薄
 俗难可一作具论。勿受外嫌猜，同
 姓古所敦。

九日寄岑参 参，南阳人。

出门复入门，两一作雨脚但如一作
 仍旧。所向泥活活一作活活，思君

令人瘦。沉吟坐西一作秋轩一作吟
卧轩窗下，饮一作饭食错昏昼。寸步
 曲江头，难为一相就。吁嗟呼一
作乎苍生，稼穡不可救。安得诛
 云师，畴能补天漏。大明韬日月，
 旷野号禽兽。君子强逶迤，小人
 困驰骤。维南有崇山，恐一作洪与
 川浸溜。是节一作时东篱菊，纷披
 为谁秀。岑生多新诗一作语，性亦
 嗜醇酎。采采黄金花，何由满一
作洒衣袖。

送孔巢父谢病归游江

东，兼呈李白 巢父字弱翁，冀州人，与李白等隐徂徕，号竹溪六逸。

巢父掉头不肯住，东将入海随烟
 雾。诗卷长留天地间，钓竿欲拂
 珊瑚一作三珠树。深山大泽龙蛇
 远，春寒野阴风景暮一作花繁草青
 春日暮。蓬莱织一作仙人玉女回云
 车，指点虚无是征一作引归路。自
 是君身有仙骨，世人那得知其
 故。惜君只欲苦死留，富贵何如
 草头露。一作我欲苦留君富贵，何如草
头易晴露。蔡侯静者意有馀，清夜
 置酒临前除。罢琴惆悵月照一作
 点席，几岁寄我空中书。南寻禹
 穴见李白，道甫问信今何如。一
本云：巢父掉头不肯住，东将入海随烟雾。

书卷长携天地间，钓竿欲拂珊瑚树。我拟把袂苦留君，富贵何如草头露。深山大泽龙蛇远，花繁草青风景暮。仙人五女回云车，指点虚无引归路。若逢李白骑鲸鱼，道甫问信今何如。

饮中八仙歌

知章贺知章，会稽人，自称秘书外监。骑马似乘船，眼花落井水底眠。汝阳让皇帝长子璿，封汝阳王。三斗始朝天，道逢一作见麴车口流涎，恨不移封向酒泉。左相李适之，天宝元年为左丞相。日兴费万钱，饮如长鲸吸百川，衔杯乐圣称世一作避贤。宗之崔宗之，日用之子，袭封齐国公。潇洒美少年，举觞白眼望青天，皎如玉树临风前。苏晋晋，珣之子，官至左庶子。长斋绣佛前，醉中往往爱逃禅。李白一斗诗百篇，长安市上酒家眠。天子呼来不上船，自称臣是酒中仙。张旭旭善草书。三杯草圣传，脱帽露顶王公前，挥毫落纸如云烟。焦遂《甘泽谣》：布衣焦遂，为陶岘客。五斗方卓然，高谈雄辨惊四筵。

曲江三章章五句曲江在杜陵西北五里。开元中，开凿为胜境。南有紫云楼、芙蓉苑，西有杏园、慈恩。都人游赏，盛于中和、上巳。

曲江萧条秋气高，菱荷枯折随风涛，游子空嗟垂二毛。白石素沙亦相荡，哀鸿独叫求其曹。

即事非今亦非古，长歌激越梢林莽，比屋豪华固难数。吾人甘作心似灰，弟侄何伤泪如雨。

自断此生休问天，杜曲幸有桑麻田，故将移住南山边。短衣匹马随李广，看射猛虎终残年。

丽人行

三月三日天气新，长安水边多丽人。态浓意远淑且真，肌理细腻骨肉匀。绣一作画罗衣裳照暮春，蹙金孔雀银麒麟。头上何所有，翠微一作作为鬋乌合反叶一作句垂鬓唇。背一作身后何所见，珠压腰褊一作褊，一作肢稳称身。就中云幕椒房亲，赐名大国虢与秦。紫驼之峰一作珍出翠釜，水精之盘行素鳞。犀箸厌饫久未下，鸾刀缕切空一作坐纷纶。黄门飞鞚不动尘，御厨络绎一作丝络送八珍。箫鼓一作管哀吟感鬼神，宾从杂一作合还实要津。后来鞍马何逡巡，当轩一作道下马入锦茵。杨花雪落覆音副白蘋，青鸟飞去衔红巾。

炙手可热势一作世绝伦，慎莫近
一作向前丞相嗔。明皇每年十月幸华
清宫，杨国忠姊妹五家扈从，每家为一队，
著一色衣。五家合队，映照如百花之焕发，
灿烂芳馥于路。而国忠私于虢国，不避虢
狐之刺。每入朝，或联辔方驾，不施帷幔，
同入禁中。

乐游园歌原注：晦日，贺兰杨
长史筵，醉中作。《英华》作晦日
贺兰杨长史筵醉歌。汉神爵中
起乐游苑，在万年县南，亦名乐
游原。唐长安中，太平公主置亭
原上，每正月晦日、三月三日、
九月九日，士女毕集。

乐游古园萃一作萃森爽，烟绵碧
草萋萋长。公子华筵势最高，秦
川水出秦岭下，一名樊川。对酒平如
掌。长生木瓢示一作乐真率，更调
鞍马狂一作雄欢赏。青春波浪芙
蓉园，白日雷霆夹一作甲城仗。阊
阖晴开映香迹，一作迹，一作映荡荡，
曲江翠幕排银榜。拂水低徊舞袖
翻，缘云清切歌声上。却忆年年
人醉时，只今未醉已先悲。数茎
白髮那抛得，百罚一作割深杯亦
一作辞不辞。圣朝亦一作已知贱士
丑，一物自一作但荷皇天慈一作
私。此身饮罢一作罢饮无归处，独
立苍茫自咏诗。

泯陂行陂在郾县西五里，周
一十四里。

岑参兄弟皆好奇，携我远来游泯
陂。天地醺惨忽异色，波涛万顷
堆琉璃。琉璃汗漫泛舟入，事殊
兴极忧思集。鼉作鲸吞不复知，
恶风白浪何嗟及。主人锦帆相为
开，舟子喜甚无氛埃。凫鹭散乱
棹讴发，丝管啁啾空翠来。沈竿
续蔓一作缓深莫测，菱一作芡叶荷
花静一作净如拭。宛在中流渤澥
清，下归无极一作临无地终南黑。
半陂已南纯浸山，动影衰窈冲融
间。船舷暝戛云际寺，云际山有大
安寺。水面月出蓝田关。即秦烧关，
在蓝田县南六十里。此时骊龙亦吐
珠，冯夷击鼓群龙趋。湘妃汉女
出歌舞，金支《房中歌》：金支秀华，乐
上众饰也。翠旗光有无。咫尺但愁
雷雨至，苍茫不晓神灵意。少壮
几时奈老何，向来哀乐何其多。

泯陂西南台

高台面苍陂，六月风日冷。兼葭
离披去，天水相与永。怀新目似
击，接要心已领。仿像识蛟人，空
蒙辨鱼艇。错磨终南翠，颠倒白
阁紫阁、黄阁、白阁三峰相去不甚远。
影。峭一作善岑《西京赋》：岩峻峭岑。

增光辉一作阴，乘陵《风赋》：乘陵高城。惜俄顷。劳生愧严遵郑补，外物慕张良邴曼容。世复轻骅骝，吾甘杂蛙黽。知归俗可忽，取适一作足事莫并。身退岂待官，老来苦便平声静。况资菱芡足，庶结茅茨迥。从此具扁舟，弥年逐清景。

戏简郑广文度，兼呈苏

司业源明苏源明，武功人，

为东平太守，召为国子司业。

广文到官舍，系一作置马堂阶下。醉则一作即骑马归，颇遭官长骂。才名四一作三十年，坐客寒无毡。赖一作近有苏司业，时时与一作乞酒钱。

夏日李公一作李家令见访

黄鹤云：按宗室世系，当是李炎，时为太子家令。

远林暑气薄，公子过我游。贫居类村坞，僻近城南楼。旁舍颇淳朴，所愿一作须亦易求。隔屋唤西家，借问有酒不。墙头过浊醪，展席俯长流。清风左右至，客意已惊秋。巢多众鸟斗一作喧，叶密鸣蝉稠。苦道一作遣此物聒，孰谓一作语吾庐幽。水花晚色静一作净，庶足充淹留。预恐尊中尽，更起为君谋。

奉同郭给事汤东灵湫作

骊山温汤之东有龙湫

东山即骊山气鸿濛一作濛濛，宫殿居上头。君来必十月，树羽临九州。阴火煮玉泉，喷薄涨岩幽。有时浴赤日，光抱空中楼。阆风入辙迹，旷一作广原一作野延冥搜。沸一作拂天万乘动，观水百丈湫。幽灵一作灵湫斯一作新可佳一作怪，王命官属休。初闻龙用壮，擘石摧林丘。中夜窟宅改，移因风雨秋。倒悬瑶池影，屈注苍一作沧江流。味如甘露浆，挥弄滑且柔。翠旗澹偃蹇，云车纷少留。箫鼓荡四溟，异香泱泱浮。蛟一作蛟人献微一作微绶，曾祝穆天子朝于燕然，奉壁南面，曾祝佐之。曾，重也。沈豪牛。百祥奔盛明，古先莫能俦。坡陀金虾蟆，喻安禄山。出见盖有由。至尊顾之笑，王母唐人多以王母比贵妃不肯一作遣收。复归虚无底，化作长黄虬一作龙与虬。飘飘一作摇青琐郎，文彩珊瑚钩。浩歌绿水曲，清绝听者愁。

夜听许十损一作许十一，一

作许十，无损字 诵诗，爱而有作

许生五台山在代州五台县宾，业白

宝积经有此白业、五戒、十善、四禅、四定、皆属善名。出石壁。余亦师粲可，达摩传慧可，慧可传梁。身犹缚禅寂。何阶子方便，谬引为匹敌。离索晚相逢，包蒙欣有击。《易·九二》：包蒙。《上九》：击蒙。诵诗浑一作混游衍，四座皆一作俱辟易。应手看捶钩，清心听鸣镝。精微穿溟滓，音幸。飞动推霹雳。陶谢不枝梧，风骚共推激。紫燕一作鸾自超诣，翠驳中曲之山，有兽如马，爪牙如虎，一角，能食豹，名曰馵。谁翦剔。君意人莫知，人间夜寥阒。

桥陵诗三十韵，因呈县

内诸官 睿宗葬桥陵，改蒲城为奉先，官如赤县。

先帝昔晏驾，兹山朝百灵。崇冈拥象设，沃野开天庭。即事壮重险，论功超五丁。坡陀因一作用厚地一作力，却略罗峻屏。云阙虚冉冉，风松肃泠泠。石门霜露一作雾白，玉殿莓苔青。宫女晚一作晓知曙，祠官一作臣朝见星。空梁簇画戟，阴井敲铜瓶。中使日夜一作相继一作日继夜，惟王心不宁。岂徒恤备享，尚谓求无形。孝理敦国政，神凝推道经。瑞芝产庙柱，好鸟鸣一作巢，一作宿岩扃。高岳前嶭峯，洪河左滢滢。钱谦益注谓：滢，《玉

篇》同蒙。胡珙、乌迺二切，无管音。漫字，《玉篇》、《韵略》具无。毛氏据此诗增，恐非。当作深。按《类篇》：漫，玄扁切。漏漫，小水貌。金城蕃峻址，沙苑交回汀。永与奥区固，川原纷眇冥。居然赤县立，台榭争岧亭。官属果称是，声华真一作宜可听。王刘美竹润，裴李春兰馨。郑氏才振古，啖侯笔不停。遣辞必中律，利物常发硎。绮绣相展转，琳琅愈一作逾青荧。侧闻鲁恭化，秉德崔瑗铭。太史候凫影，王乔随鹤翎。朝仪限霄汉，客思回林坰。坎軻辞下杜，飘摇陵一作凌浊泾。诸生旧短褐，旅泛一浮萍。荒岁儿女瘦，暮途涕泗零。主人念老马，廨署一作宇容一作客秋萤。流寓理岂惬，穷愁醉未醒。何当摆俗累，浩荡乘沧溟。

沙苑行 沙苑在冯翊县南，东西八十里，南北三十里，其地宜畜牧。唐置沙苑监，掌牛马诸牧。

君不见左辅白沙如白水一作白如水，缭以周墙百馀里。龙媒昔是渥洼生，汗血今称献于此。苑中骠牝三千匹，丰草青青寒不死。食音字之豪健西域无一作腾西域，每岁攻一作牧，一作牧驹冠边鄙。王

有虎臣司苑门，入门天厩皆云屯。骠骠一骨独当御，春秋二时归一作朝至尊。至尊内外马盈亿，一作内外马数将盈亿，伏枥在垆空大存。逸群绝足信殊杰，倜傥权奇难具论。累累塹阜藏奔突，往往坡陀纵超越。角壮翻同一作腾麋鹿游，浮深簸荡鼉鼉窟。泉一作海出巨鱼长比人，丹砂作尾黄金鳞。岂知异物同精气，虽未成龙亦有神。

驄馬行 原注：太常梁卿敕賜馬也。李鄧公愛而有之，命甫制詩。

鄧公馬癖人共知，初得花驄大宛種。夙昔傳聞思一見，牽來左右神皆竦。雄姿逸態何嶄嶄，顧影驕嘶自矜寵。隅目青莢夾鏡懸，肉駿一作鬃礪礪連錢動。朝來久一作少試華軒下，未覺千金滿高價。赤汗微生白雪毛，銀鞍却覆香羅帕。卿家舊賜公取一作有之一一作能取，天厩真龍此其亞。晝洗須騰涇渭深，朝一作夕，一作晨趨可刷幽并夜。吾聞良驥老始成，此馬數年人更驚。豈有四蹄疾于鳥，不與八駿俱先鳴。時俗造次那得致，雲霧晦冥方降精。近聞下詔喧都邑，肯使一作知有驄驎

地上行。

去矣行 鮑欽止曰：天寶十四載，甫在率府，數上賦頌，不蒙采錄。欲辭職去，作《去矣行》。

君不見韝上鷹，一飽則飛掣。焉能作堂上燕，銜泥附炎熱。野人曠蕩無醜顏，豈可久在王侯間。未試囊中餐玉法，明朝且入藍田山。后魏李預推玉七十枚為屑，日服食之。藍田山出美玉。

自京赴奉先縣詠懷五百字 原注：天寶十四載十二月初作

杜陵有布衣，老大意轉拙。許身一何愚一作過，竊比稷與契。居然成覆落，白首甘一作苦契一作琴。蓋棺事則已，此志常觀豁。窮年憂黎元，嘆息腸一作腹內熱。取笑同學翁，浩歌彌激烈。非無江海志，蕭洒送一作送日月。生逢堯舜一作為君，不忍便永訣。當今廊廟具，構厦豈云缺。葵藿傾太陽，物性固莫一作難奪。顧惟螻蛄輩，但自求其穴。胡為慕大鯨，輒擬偃溟渤。以茲悟一作誤生理，獨耻事干謁。兀兀遂至今，忍為塵埃沒。終愧巢與由，未能易其節。沈飲聊自適一作達，放歌頗愁絕。歲

暮百草零，疾风高冈裂。天衢阴
 峥嵘，客子中夜发。霜严衣带断，
 指直不得一作能结。凌晨过骊山，
 御榻在嵒岨。蚩尤塞寒空，蹴蹋
 崖谷滑。瑶池气郁律，羽林相摩
 戛。君臣一作圣君留欢娱，乐动殷
 轳轳。一作胶葛，一作蝎蝎，一作福竭
 竭，一作汤竭。赐浴皆长纓，华清宫内
 供奉两汤，外更有汤十六所。安禄山及将
 士，杨国忠兄弟姊妹，并赐浴、赐食、赐钱。
 与宴一作谋非短褐。彤庭所分帛，
 本自寒女出。鞭挞一作笞其夫家，
 聚敛贡城阙。圣人筐篚恩，实欲
 一作愿邦国活。臣如忽至理，君岂
 弃此物。多士盈朝廷，仁者宜战
 栗。况闻内金盘，尽在卫霍室。中
 堂舞一作有神仙，烟雾散一作蒙玉
 质。暖客貂鼠裘，悲管逐清瑟。劝
 客驼蹄羹，霜橙压香橘。朱门酒
 肉臭，路有冻死骨。荣枯咫尺异，
 惆怅难再述。北辕就泾渭，官渡
 又改辙。群冰一作水从西下，极目
 高崒兀。疑是崆峒来，恐触天柱
 折。河梁幸未坼，枝撑声窸窣。行
 旅相攀援，川广不一作且可越。老
 妻寄一作既异县，十口隔风雪。谁
 能久不顾，庶往共饥渴。入门闻
 号咷，幼子饥一作饿已卒。吾宁舍
 一哀，里巷亦一作犹呜咽。所愧为

人父，无食致矢折。岂知秋未一
 作未登，贫窶有仓卒。生常一作当
 免租税，名不隶征伐。抚迹犹一
 作独酸辛，平人固骚屑。默思失
 业徒，因念远戍卒。忧端齐一作际
 终南，颍洞不可掇。

奉先刘少府新画山水障 歌

《英华》题作：新画山水障歌，
 奉先尉刘单宅作

堂上不合生枫树，怪底江山一作
 山川起烟雾。闻君扫却赤县图，
 乘兴遣画沧洲趣。画师亦无数，
 好手不可遇。对此融心神，知君
 重毫素。岂但祁岳画景有名无迹者
 二十五人，祁岳在李国恒之上。一云乃祁
 乐之误，岑参有送祁乐诗。与郑虔，笔
 迹远过杨契丹。隋参军杨契丹，山东
 人，六法兼修。得非悬圃裂一作坼，无
 乃潇湘翻。悄然坐我天姥下，耳
 边已似闻清猿。反思前夜风雨
 急，乃一作恐是蒲一作满城鬼神
 入。元气淋漓障犹湿，真宰上訴
 天应泣。野亭春还杂花远，渔翁
 暝蹋孤舟立。沧浪水深青溟阔一
 作沧浪之水深且阔，欹岸一作峰侧岛
 一作岸秋毫末。不见湘妃鼓瑟时，
 至今斑竹临江活。刘侯天机精，
 爱画入骨髓。自有两儿郎，挥洒
 亦莫比。大儿聪明到，能添老树

巖崖里。小儿心孔开，貌音邀得山僧及童子。若耶溪，云门寺。俱在会稽。吾独胡为在泥滓，青鞋布袜从此始。

白水即奉先县崔少府十九翁高斋三十韵原注：天宝十五载五月作。

客从南县来，浩荡无与适。旅食白日长，况当朱炎赫。高斋坐林杪，信宿游衍阒。清晨陪跻攀，傲睨俯峭壁。崇冈相枕带，旷野怀一作回，一作迥咫尺。始知贤主人，赠此遣愁寂。危阶根青冥，曾冰生淅沥。上有无心云，下有欲落石。泉声闻复急一作息，动静随所击一作激。鸟呼藏其身，有似惧弹射。吏隐道一作适，一作通，一作识性情，兹焉其窟宅。白水见舅氏，诸翁乃仙伯。杖藜长松阴，作尉穷谷僻。为我炊雕胡，逍遥展良觌。坐久风颇愁一作怒，晚来山更碧。相对十丈蛟，欵翻盘涡坼。何得空里雷，殷殷寻地脉。烟氛一作气藹嶒一作嶂，岬岬森惨戚。昆仑崆峒颠，回首如一作知不隔。前轩颓一作摧反照，巉绝华岳赤。兵气涨林峦，川光杂锋镝。知是相公军，天宝十四载，禄山反，拜哥舒翰为兵马副元帅以讨禄山。明年正月，加同平章

事。铁马云一作烟雾积。玉觴淡无味，胡羯岂强敌。长歌激屋梁，泪下流衽席。人生半哀乐，天地有顺逆。慨彼万国夫，休明备征狄一作敌。猛将纷填委，庙谋蓄长策。东郊何时开，带甲且来一作未释。欲告清宴罢一作疲，难拒幽明迫。三叹酒食旁，何由似平昔。

三川观水涨二十韵原注：天宝十五载七月中避寇时作。按三川属郾，以华池、黑水、洛水同会得名。

我经华原来，不复见平陆。北上唯土山，连山走穷一作穹谷。火云无时出一作出无时，飞电常在目。自多穷岫雨，行潦相飏一作友蹙。蓊音乌尙音阁，又音温川气黄，群流会空曲。清晨望高浪，忽谓阴崖踣。音副。恐泥窜蛟龙，登危聚麋鹿。枯查卷拔树，礧魄共充塞。声吹鬼神下，势阅人代速。不有万穴归，何以尊四渎。及观泉源涨，反惧江海覆。漂沙坼岸去一作去岸，漱壑松柏秃。乘陵一作凌破山门，回鞞裂一作倒地轴。交洛赴洪河，及关岂信宿。应沈数州没，如听万室哭。秽浊殊未清，风涛怒犹蓄一作蓄。何时通舟车，阴气不一作亦黠默。浮生有荡汨，吾道正

羈束。人寰难容身，石壁滑侧足。云雷此一作屯不已，艰险路更跼。普天无川梁，欲济愿水缩。因悲中林士，未脱众鱼腹。举头向苍天，安得骑鸿鹄。

悲陈陶 陈涛斜，在咸阳县，一名陈陶泽。至德元年十月，房琯与安守忠战，败绩于此。

孟冬十郡良家子，血作陈陶泽中水。野旷一作广天清一作晴无战声，四万义军同日死。群胡归来血一作雪洗箭，仍唱一作捻箭胡歌饮都市。都人回面向北啼，日夜更望官军至一作前后官军苦如此。

悲青坂

我军青坂在东门，天寒饮马太白窟。黄头奚儿日向西，数骑弯弓敢驰突。山雪河冰野一作晚，一作已萧瑟一作飏，一作飒，青是烽一作人烟白人骨。焉得附书与我军，忍待明年莫仓卒。苏轼曰：琯既败，犹欲持重有所伺。而中人邢延恩等促战，仓皇失据，遂及于败，故后篇云。

哀江头

少陵 汉宣帝葬杜陵，许后葬南园，谓之小陵，后人呼为少陵，杜甫家焉。野老吞声哭，春日潜行曲江曲。江头宫殿

锁千门，细柳新蒲为谁绿。忆昔霓旌下南苑，苑中万物生颜色。昭阳殿里第一人，同辇随君侍君侧。辇前才一作词人带弓箭，白马嚼一作嚼啮黄金勒。翻身向天一作空仰射云，一箭一作笑，一作发正坠双飞翼。明眸皓齿今何在，血污游魂归不得。清渭东流剑阁深，去住彼此无消息。人生有情泪沾臆，江水一作草江花岂终极。黄昏胡骑尘满城，欲往城南忘南一作望城北。

哀王孙 《旧书》：天宝十五载六月九日，潼关不守。十二日，明皇自延秋出幸蜀，亲王妃主俱不及从。

长安城头头一作多，一作颈白乌，夜飞延秋门上呼。又向一作来人家啄大屋，屋底达官走避胡。金鞭断折九马死，骨肉不待一作得同驰驱。腰下宝玦青珊瑚，可怜王孙泣路隅。问之不肯道姓名，但道困苦乞为奴。已经百日窜荆棘，身上无有完肌肤。高帝子孙尽隆一作高淮，音拙。龙种自与常人殊。豺狼在邑龙在野，王孙善保千金躯。不敢长语临交衢，且为王孙立斯须。昨夜东一作春风吹血腥，东来橐一作骆驼满旧都。